

FESTIVAL DA LA CHANZUN RUMANTSCHA

Novas canzuns per scolaras e scholars dalla Romontschia

Per la tiarza gada organischescha l'Uniun Chanzun rumantscha ina scuntrada interromontscha che stat ell'enzenna dalla canzun e musica romontscha. Il festival ha giu liug a Trun (2019), a Zuoz (2022) e cuntinuescha ils 3–5 d'october 2025 a Vella. La scuntrada cantica porscha ina tribuna per novas ideas e lai daventar cunscients dil grond scazi musical dalla Romontschia.



La tiarza ediziun dil Festival da la Chanzun rumantscha ha liug quella gada en ina dallas valladas las pli romontschas, numnadamein la Val Lumnezia. Da quella val laterala derivan gronds cumponists e litterats. Cheu s'entaupa onn per onn era la giuventetgna per guder musica agl Open Air Lumnezia. Era il Festival da la Chanzun rumantscha vul tonscher il microfon a nossa giuventetgna. L'occurrentza ei publica e sedrezza a giuven e vegl.

Scolaras e scholars han scret sezs
Ed aschia datti gest all'entschatta dil Festival da la Chanzun rumantscha 2025 canzuns novas pil ciclus 2 da scola. Il venderdis, ils 3 d'october concerteschon scolaras e scholars dallas 5 e 6avlas classas dalla vischnaunca dad Ilanz/Glion e dalla Lumnezia e presentan ensemen canzuns ch'ellas ed els han scret sezs. Gia igl atun 2024 han els filau vid lur texts ch'ei lu vegni mess en melodia dalla band turitgesa «Silberbüx». En quater luvratoris da scriver ein naschidas 16 poesias sur da lieurs inamuradas e carrieras stravagadas, sur dil sport creativ ed il ballapei competitiv, sur da risadas e plaschers dallas cuntradas.

Cunquei che las capacitads eran denton restrenschidas han sulet nov texts anflau la via tier «Silberbüx». Co quels texts tunan pon ins pia udir sin tribuna dil Festival da la chanzun rumantscha a Vella. Ils ulteriurs siat texts vegnan publicai en La Quotidiana e quei gia avon ch'il festival entscheiva. Las poesias vegnan stampadas senza melodia – aschi per dir sco «amuse-bouche» dil Festival da la Chanzun rumantscha 2025. E tgisa, forse datti cumponistas e cumponists che san e pon far diever dils texts, aschia ch'els survegnan tuttina aunc ina melodia.

Alice Bertogg, menadra dils luvratoris da scriver canzuns

Il concert cun las canzuns dils affons ei d'udir gest sco avertura dil Festival da la Chanzun rumantscha a Vella, e quei ensemen culla formaziun «Silberbüx», venderdis, ils 3 d'october 2025 allas 19.00 en halla plurivalenta a Vella.

Dapli informaziuns davart il Festival da la Chanzun rumantscha sin: www.chanzunrumantscha.ch



In luvratori da scriver canzuns digl atun vargau, cheu cun la menadra Alice Bertogg.

FOTO MAD

Nos sports preferi

Refrain:
En nies temps liber bia sport fagein,
e buc mo ils geniturs vilentein.
Hockey, karate, ballapei e lutgar,
quels quater sports uss lein presentar.

1. strofa
Il pli bugen jeu unihockey dun.
Jeu schess – in bien goli sun.
Trenar, suar e bein mirar
ed alla fin lu gudignar.

2. strofa
Lutgar en Svizra ei popular,
mo quei sa buca mintgin far.
Herox ei dat e schizun in retg
cun in muni grond sut tetg.

(Refrain)

3. strofa
A karate bugen jeu mon.
Quei fetsch jeu ora Glion.
Tschentas da colurs, gie bellezia,
tradeschan a ti mia fermezia.

4. strofa
Dar ballapei ei miu plascher,
pertgitar il gol ei miu duer.
Cun grond anim vi giugar
ed ils giugs lu gudignar.

(Refrain)

5. strofa
E tgei sport fas ti bugen?
Vas ti er'a trenament?
Siuas persuls ni cull'equipa
Ni s'audas gia tier l'elita?

(Refrain)

La canzun «Nos sports preferi» ei da Moreno Ragettli, Levin Räss, Lauro Elia Dermond e Marc Wäfler. Igl onn da scola 2024/25 han els frequentau la 5avla e 6avla classa dalla scola Rueun, Ruschein/Ladir ed a Duvin. Ed els han mess en rema lur sports preferi.

Sport creativ

Refrain:
Si giu – si giu,
ei peglia buca fin.
Vi e neu, vi e neu
e quei fa uss mintgin.

1. strofa
Sche jeu mon cun skis
sun enta parvis.
Segliel e sai buc spitgar
Da puspei sisum arrivar

2. strofa
Miu tgierp ei plein tensiun
la neiv dat siu resun.
In moviment, in sentiment
Snowboard – miu element

(Refrain)

3. strofa
El va bein silla canta,
cul skateboard silla rampa.
Cool eisi da far bia trics
Sas far in bi «kik flip»?

4. strofa
Mon cun calzers da rodas.
Magari datti nodas.
Jeu fetsch quei feg bugen,
sco da sgular sul terren.

(Refrain)

La canzun «Sport creativ» ei da Gian Bearth, Nora Salzgeber, James Bisquolm e Leon Deplazes. Igl onn da scola 2024/2025 frequentavan els la 5avla e 6avla classa da Castrisch, Sevgein, Riein e Luven. Ferton che Gian ei in bien skiunz, fila Leon sil snowboard dallas pista giu e James fa ses tricks sil skateboard. Nora preferescha denton empau dapli rodas vid ils peis e gauda las piruettas culs calzers da rodas.

Tut ha in num

1. strofa
Ei dat prominents sco Messi,
Mbappé
E tuts cloman fetg dad ault «juhe»!
Ei dat interprets sco Justin Bieber.
Ed els han fetg bia «Fanmitglieder».

Refrain:
Entscheivel cun I E A O U
Ni cun P R F ni Q
Per exempel: Marilu «Juhu»

2. strofa
Schizun animals da cas'han nums.

E sch'ins clom'els fan els spruns,
Zausgi, Axel ni Jolly Jumper,
gat ni tgaun ni has in «hamster»?

(Refrain)

3. strofa
Vitgs e marcus han è lur nums.
Capuns e maluns dat ei a Salums.
Noss'industria ei a Domat/Ems.
E leu sas luvrar da tut il temps.

(Refrain)

La canzun «Tut ha in num» ei da Maris Ammann, Lias Aubry, Lucien Ludescher e Néo Hohl. Igl onn da scola 2024/25 visitavan els la 5avla e 6avla classa da Castrisch, Sevgein, Riein e Luven. Els han giu il dètg slontsch duront scriver lur poesia e cunquei che treis dalla gruppa ein da lieunga tudestga ein era seschluitai entgins plaids tudestgs els vers. Mo perquei che las remas van si aschia dètg bein han las persunas d'instrucziun e la menadra dil luvratori da scriver serrau giu dus eglis.

L'Uniun Chanzun Rumantscha ha era ediu in cudischet che cuntegn tut las canzuns e texts. Quei carnet ei destinaus oravontut per las scolas e per cantar novas canzuns romontschas.

